

Grupo di ciudadano preocupa ta organisa mañan

Manifestacion na Parlamento contra molinanan na Urirama

UN grupo di ciudadano preocupa, cu a identifica nan mes como grupo “Salba Urirama” pa enfoca riba e consecuencianan devastador cu e molinanan aki lo trece pa Aruba. Ta trata di ciudadanonan cu di basta tempo ta hopi preocupa cu e proyecto di molina di biento na Urirama. Nan a sostene tur otro accion cu a cuminsa, Save Alto Vista y esun di habitantenan. Awor e momento crucial a yega, y nan ta sinti cu awor mester

haci tur lo posibel pa para e proyecto mirando con e debate ta bayendo den Parlamento.

E grupo aki lo entrega un manifesto diamars dilanti Parlamento n’e lidernan di fraccion y n’e Parlamentarionan independiente.

Den e manifesto aki nan lo pidi cada lider di fraccion y cada Parlamentario independiente pa nan cooperacion pa no aproba e proyecto di molina di biento di Urirama.

E motibonan ta varios.

1. Tin demasiado duda riba e aspecto di salud, y tanten nos no ta sigur nos no por sigi cune, tin mucho hende ta biba eybanda:
2. Ta un area hopi grandi di naturalesa nos ta perde:
3. E area sagrado di Kapel di Alto Vista ta wordo afecta; e molinanan ta espantoso y grandi banda di nos kapel chikito y sereno:
4. E no ta baha nos prijs di awa y coriente, pero di otro banda si e ta afecta nos turismo

Ademas tin varios otro alternativa. P.e. inverti e 250 milyon florin cu e molinanan ta costa den WEB pa WEB mes bira menos dependiente di fuel. Inverti den otro tipo di energia alternativo.

Si nos no tin ningun beneficio cune, dicon mester dañá naturalesa, dañá un area sagrado, y pone salud di hende na riesgo? E grupo aki ta organisa un conferencia di prensa awe dialuna 11 or den curason di Noord.

«Salba Urirama» ta invita henter pueblo pa asisti diamars na Parlamento, pa presencia e entrega di e manifesto n’esnan cu mester tuma e decision. 4 Or lo topa na Wilhelminapark, y 5 or lo bay Parlamento, pa haci entrega.

E manifestacion aki no ta uno politico, sino un invitacion pacifico na henter comunidad pa sostene e peticion aki na Parlamentarionan y lidernan di fraccion.